

西湖志卷之四

藝文

請大濬本州西湖奏



臣州有西湖接濠而通南湖潴蓄灌溉旱運勞泄民以享豐年之利自為資緣者請射為池戶魚塘蔬圃封畛其間至券售如世業水源障塞旱澇皆害州地狹民貧小歉難枝梧此平湖彌望皆負郭良田罔納租稅而池戶長享重利第以圭撮稍入不侔甚矣乞於農隙稍尋其舊州舊無放生池如將西湖充之仰祝兩宮之壽歲不過損州公使庫池戶數百緡而公私便利為惠無窮也

濬河記畧

劉克莊

古河繚城內外如人氣血周於一身歲久而淤趙忠定公嘗濬之甲子踰一週水道故存居人蓋搭為浮屋築為高砌堙為平陸矣淳祐戊申待制陳公既濬內河修撰趙公至而嘆曰胸腹雖通支節猶壅未也顧內河纔六百丈而外河加三百餘丈役不可弛民不可勞迺白於官詢於衆於是暨公之尊貴者屬吏之才敏者皆條利便來告公虛心以聽先是寺產滿百錢者濬三尺產二百以下皆數公下令產滿百者濬二尺已濬

西湖志

卷之四

藝文

內河者半之負郭三邑寺產三百以下餘十縣寺產六百以下者皆免敷遂畫界限度丈尺總以十大寺而餘寺分隸焉近寺募工遠寺助費率以產滿百者助二工按籍給由下之十縣以僧督僧吏拱手不得與寺尤遠而輸未至者先兌庫錢委郡丞趙君時願率屬林君叢桂節度推官徐君士廉泣其役不徙木而信不施扶而勉起淳祐庚戌九月乙亥十日而畢河深五尺廣一丈用工四萬六千有奇工給寶瓶楮三通不過數十楮十四萬而百年水道唾手而復竣事士民有乞濬姚爐橋支河者自言忠定公昔為西南二湖今南湖半為菱地蓄洩無所田失灌注民罹漂害公使未敷之寺分濬之計支河六十六丈南湖四十四丈是役也達民氣助火政通潮汐行舟楫其大者壯軍府之容增金湯之勢公之慮深且遠矣公名希靜自九卿以鈇鉞出鎮重厚持大體文武有威風惠利不可殫紀浚河特其一耳

殷公祠記

林 懔

殷公祠者祀吾省故殷巡撫公也公諱從儉廣西臨桂人隆慶五年奉璽書以僉都御史督閩軍務明年召入為副都御史未幾卒閩人罷市哭如哭所親喪西歸里巷哭以過樞婦人則哭拜於門內得人心如此懔時為文弔之自嘉靖間吾土有倭寇至尊肝

食思得紓南顧憂於是朝議謂定置撫臣蓋歷數公者至譚司馬始定之又歷數公者至公始安之當時識者或以嫌爲知言云公卒之三年閩人思公不置爲建祠西郊外萬歷二年某月某日也遂爲述其事系以詩曰閩號樂土僻海一隅民之質矣山畊水漁或治或否撫我何如當嘉靖末倭夷用急劉我人民掠我城邑鯨波未澄燕幕安集赫赫明明肅皇聖武命譚大夫作鎮開府掃除東夷綏寧南土喪亂旣平旣安且定載號載呶有作弗靖赤子龍蛇卒警百姓穆穆昭陵怙冒至仁文武大吏孰予撫閩選於衆舉殷公其人節鉞旄蓋殷公至止田畝多荒瘡痍未起譬治亂繩宜寬而理滔滔大海羣蠻在東有將矜勇往殪彼戎毋寧鎮靜勿覬有功寇盜之餘室家懸磬軍需旁午有嚴其令無寧撙節緩征弛禁公宴賓佐樂舞有奕請卜其夜樂不可極令此三軍嚮晦宴息公命經營子來歡趨彼食其力吏勿追呼令此百城安於里閭先時公出盛其軍容公於簡閱羸卒以從先時公府盛衛以兵公在宴處庭無人聲鄭歌僑如蜀思諸葛民之無祿昊天降割西郊之外湖水之澣作廟翼翼籩豆有楚弗畛禋祀千春萬古

澄瀾閣記

馬森

古人體國經野必先水利重民食也粵稽大禹盡力溝洫孔子亟稱焉有以哉始閩福

西湖志

卷之四

藝文

一

郡城外築三湖疏渠通河隄陂橋閘立水準丈尺而謹司之法善而利溥也史載晉嚴高鑿治以爲蓄洩蓋以郡東西鄙皆受西北諸山之水又合而爲東南注逆江海之潮經畧不可緩也旱乾水溢藉東西南之湖深蓄以灌溉高田連堰隄圩之障堅崇以不淹低土備旱澇而兩利之爲謀至深遠也宋南渡間漸多湮塞趙忠定公汝愚疏陳興復而修治之沿威武堂故址臨水建閣題曰澄瀾蓋知重諸湖之滌矣厥後南湖首湮民塞而盡田之東湖繼亦土作又矣西湖猶僅存十之三四按梁克家三山志猶云時溉三邑民田至一萬五千餘畝先可知矣若今之故址能有幾哉官取魚租陂池盡廢遺失古意久矣按察使龍灣徐公中行因湖中故墟芟而闢之建閣其上接前迎恩亭而橋之以登眺焉郡城中外四望一覽仍舊名曰澄瀾閣謂余曰此趙忠定公所題也請志之余曰噫嘻有心哉茲建乎夫湖水之聚也瀾水之湍也湍急之流而注之則必其所蓄者大也湖寧止此今民田不可復爲湖矣有不可度汗下之曠土而因之以興利耶龍灣公先守汀越數歲來副閩臬轉藩叅按察使心存漸被故序郭子長集特重其水道書五通以關於閩者大乃若茲構非義在存羊歟夫爲田本高於江海勢也而爲湖必高於田乃有益故高築圩岸以防澇使暴漲無容入廣隄湖以備旱使浸澤有

所洩此古人治高田低田之法大約莫詳於此者則湖利如之何其不講耶登斯閣也
觀斯名也睇瞰川原明審通塞當必勃然興念詳故實而相度地宜以次第舉之耳今
大中丞惺菴龐公保釐方殷下令疏濬內外河渠此已爲之兆也後有作者烏乎能已
若曰以壞敝民田廬爲病則有宋蘇子瞻錄進單鐸吳中水利書之論參以閩土水勢
而酌量之或亦是一左券也

重修福州西湖閘記

李思誠

福州之西爲湖十數里接北關通南港蓄水溉田計一萬五千餘畝濬於晉之太康湮
於五季復於宋則趙忠定之功也予奉勅來視水利則久爲豪右所據種魚以牟利矣
詭名受稅奄而有之致啓閉不時蓄洩失度閩地入春多雨當畚插方興之時而水且
溢入不勝澎湃之災至夏苦旱當桔槔欲施之時而塵坌相吹曾不收涓滴之潤昔西
門豹治鄭蘇端明守杭皆疏濬以垂永遠乃千百年古蹟爲萬姓所仰賴者竟扼于狐
鼠之輩而廢不講令嗷嗷之憂旱澇也豈不惜哉熊思誠泊陳匡左二公相繼抓搔其
事比去而侵閘如故予趣具牘行之議改里排輪佃夫里排豪強之隱名也議增稅給
業夫增稅侵漁之詭計也予決意力破浮說悉一夙弊時方暮春耕事良迫因捐貲屬

西湖志

卷之四

藝文

三

陳幕史日夜併工修南北二閘置鑰下鑲令環湖而田者數百家爲甲鱗次司禁太溢
則啟而洩之稍平則閉而蓄之猝遇水旱庶其有濟乎復與金邑令合議舊所輸臬司
公費銀一十七兩有奇悉與捐除以湖歸官以湖利歸民卽諸豪臨淵之羨難以藉口
矣比告竣而復有以漁取稅額之說進者夫朝三暮四其說稍變則湖猶豪之湖也以
種魚而橫奪於前以取魚而巧擅於後政復何異且山林川澤之利弛以與民王制昭
昭何貪此小利爲語云興利莫若公去害莫若盡謹勸此以告後之來者其許我否

書郡志後

林煙

余嘗讀南史見謝靈運從文帝求回踊湖會稽太守孟覲堅不聽復求休崑湖又不聽
夫康樂名士也植湖以自封陋甚矣若覲者不奪民之利以徇人卽文帝有不能予也
非古之賢二千石哉三山自嚴太守高鑿東西湖東湖久湮爲田西湖則周迴十餘里
灌民田幾萬五千餘畝宋歷諸郡守修築未就淳熙中趙忠定汝愚帥閩疏請開濬朱
文公元晦詠以詩曰百年地僻有奇功此樂從今與衆同余味茲詩毋亦當時爲豪右
所侵迨忠定始濬而復之而文公以志喜歎近歲城狐社鼠營爲窟穴旱澇交病民受
其殃熊陳兩公相繼區畫以利予民盡繩諸狐鼠輩庶幾復見忠定之舊而兢兢之視

實繁有徒卽欲有爲文公之歌者輒以流言訕其後嗚呼謝康樂不能得之孟覲今以數積猾而能陰盡之有司也使覲而在雖爲之執鞭所忻慕焉

西湖通水關記

葉向高

八閩東南之所稱靈臯也而三山形勝爲諸郡雄其水茹溪受潮紆縈若帶銅盤諸流復滙而爲湖道以四關經緯郡治蓋此邦之殷繁茂昌實式靈之矣比年以來水道漸淤雖溪潮無恙而北關納潮之故道湮塞無存向之經緯故治者僅同行潦於是縉紳先生學弟子及三老父兄咸言閩靈垂澤諸所不便狀欲請而復之未得也太守武林江公視事踰年邦大協和乃身自行河登郡城四顧覽觀慨然嘆曰是河不疏後其陸乎且湖水西渟無復迴抱風氣瀉矣守實不穀以忝邦人其將圖此役也遂日夕焦思集諸吏民陳說便宜而公獨裁以清衷適中竅會公初策河仰于潮其勢易枯上源不開下將日壅則議復西河之水折入北關以與溪潮會而下流濬矣公又策河流難通雖東西高下勢如建瓴可一瀉盡也流之不接源何以供則議壘石爲閘鍵木爲關扇而蓄之吐納有度而盈縮之權可得而操矣公又策湖水漲決將徙而嚙城是我委利於河而移患於城也則議樹閘於北關之外以膺湖衝而金湯固矣公又策工役繁興

西湖志

卷之四

藝文

四

縣官之帑藏無所取羨而民力又方絀也其若何以佐費則議庀嘉肺之羨繕爲木石資又議先隄河次決湖以測水之淺深仍其通而疏其壅者役乃大蠲而公私稱兩利矣公旣殫精於河畫無遺慮乃奏記兩臺使者併藩臬諸大夫先後報可遂以萬曆戊子孟夏肇工凡五閱月而工成洋洋湯湯澤流無窮而公猶按故牘籍湖之賦於民者盡捐以予諸生而移其征于墾田之稅又復湖中之開化山亭焉舟焉郡之士民聚族來遊相與語曰美哉吾太守公之爲茲役也吾向苦河之艱舟而誰爲之鱗次浮乎卽我抱甕而得飲甘也誰奉以醍醐哉其祝融之虐吾室廬者又誰鼓陽侯驅之俾有甯宇也又其大者以吾人士之遜往烈也毋亦川靈之失職使然而今衆流朝宗若輻輳矣則又誰伐也夫吾郡之有河而無河久矣至太守公乃始有河又始有河之利天其憫我邦人而遣之太守公以造福於我哉二三子識之予不佞聞士民之誦說公心向慕之而公又屬予爲記成事予惟任事之難久也非任事難也被見利害之不切於其躬而莫適以身任也又內奪于遽廬外搖于築舍而莫能任也卽不然者而能有堅堅或亦迫羣議而斬見功非出于惻怛真誠之本心德易朽矣若公治河之役固吾邦人數十年來之所遞議遞休而莫任其責者令公稍視難而姑見緩陽受其端徐而託於

二三之說以自解而謝邦人孰迫公也乃公勤勤矻矻二載弗休不啻其身瘁而家弗理也至竟其大旨則在於鼓士類阜民生不難勞其身以徼福乞靈於川流蓋至今日而後公喜可知已而公又欲次第闢劍池祀龍神復路通河之三十六灣以完形勝於是乎公之真誠惻怛孜孜爲民也真天性固然令世之任事者皆如公夫甯憂天下哉昔召翁卿開通溝瀆起水門堤闕廣溉民愛而父之而文翁蒞蜀好教化蜀地學者比肩齊魯學宮世世祠祀此其人皆聲稱蔚起爲循吏規而公意且兼之其遠在二子上乎公名鐸字士振別號縉石浙之仁和人

上中丞濬西湖啟

孫昌裔

爲興復會城形勝祈疏舊蹟竣新工以煥人文以裨水利事閩越山川所萃雖屬造設之奇文章風氣攸關尤藉作興之力自昔常懷明德而今更仗鴻恩竊見海邦舊稱澤國名勝昭然耳目剏闢載在圖經惟湖踞城西滙舞鳳躍龍於一鏡而嶼浮水面集浴鳧飛鷺於孤洲翡翠樓臺雲霧中何異靈鰲駕出水晶宮殿煙波裏非由巨蜃驅來四圍山湧芙蓉煙樹峯巒與天上一帶波連睨睨笙簫雞犬在火西東繁華當偏霸之雄佳麗爲全閩之冠時代移而滄桑未改棖題朽而邱壑猶存迨有宋趙丞相立議疏

西湖志

卷之四

藝文

五

湖爰拓先年之址暨我明汪郡守捐貲復寺仍標開化之名歲月曾未幾何俯仰又成陳迹野花黃蝶自領春風菱唱漁歌尙聞夜月近採堪輿之衆議謂此地正當巽隅遂合縫掖之僉謀就昔基鼎新甲觀奉文昌而居所北辰南斗中天積翠玉臺遙依薇省以爲垣左鼓右旗飛閣流丹紅日近窓開八面登臨盡納湖光軒聳百尋呼吸可通帝座兼以鳳岡對峙九苞鳴翹翹之和聲况復烏石平臨雙塔映層層之彩筆似此波瀾澄澈洵爲蛟龍蟠躍之區若云境界空明允矣奎璧昭回之象惟是周遭日侵于豪右千頃波豈得如初抑且拮据莫湊於單微九仞泉詎能遽及茲來盛舉胥賴名賢恭逢我中丞宏詞名世峻品凌霄玉燦日光一代重昌黎之望文經武庫萬邦憲吉甫之猷持衡以造育中州羅麟鳳而記圖書海內共宗其模範抗疏以匡扶正氣炯日星而光河嶽 宸衷亦注其姓名光奉簡掄儼臨觀察春生秋肅灑八閩之惠露芘宇皆戴二天左史右圖攜兩袖之清風執法凜然三尺然猶虛懷吐握於名下英秀之彥靡不盡收抑尤銳意興除凡民間利病所關悉蒙力任慶人師之幸遇卜天運之將回伏祈特主勝因俯成盛事俾新工或竟蘭橈桂棟聿增輪奐之輝更舊迹不湮花塢柳堤益綴清暉之韻塘開一鑑任天光雲影之徘徊井聚五星與斗氣台垣而炳耀庶此日道

南之淵源不墜文章理學仍紹濂洛之真傳冀他時湖西之桃李成陰詞賦風猷遠媲白蘇之鉅美

重濬福州西湖碑記

沈 涵

自古大臣爲天子靖封疆爲兆民計久遠必取一方形勢而熟籌之因以興利捍害澤當時而垂後世非徒侈山川林壑之美而已也昔白香山判杭州首役西湖厥後蘇端明繼之至今蘇白二隄嘖嘖人口夫兩公皆曠代賢豪其所興作豈好勞哉蓋錢塘踞浙江上游萬山之水驟發而無所容則奔潰于會城漫衍于鄰郡西湖並受其害故濬湖築隄使上流有所滯則下流不爲災功德最鉅後人不察祇視六橋三竺爲攬勝之區有增華而無疏鑿甚則豪右侵牟浸失前人本旨矣今福州會城之西湖亦猶是也會城民物蕃庶西北諸峰俯瞰郡堞澇則溪湖淫溢加以海潮逆上田廬有巨浸之憂旱則一望焦土求勺水不可得晉太康中嚴太守高始闢爲湖周十數里溉田可萬五千畝宋南渡漸湮淳熙間趙忠定力爲修復朱子作詩美之自元至明屢興屢廢載在郡志茲歲久愈淤幾平陸矣嗚呼廢興之故雖曰運會豈非人事哉今總督將軍金公巡撫都御史梅公奉 天子命開府是邦廉民間利病甚悉慨然以復湖爲己任爰暨

西湖志

卷之四

藝文

六

布政使高公按察使范公按圖悉返所侵地捐清俸募貧民疏之鍵關壘闢疏穢納流經始於甲申春正月告竣於是冬不廢民間半鑿而大工迄就更以其餘卽湖心開化寺葺而新之俾在位者於政事之暇有以滌煩破滯而都人士亦得於花晨月夕徜徉游息余承乏學使者初抵郡見城河細若行潦今則舳舻畢達食貨交集計省民間負戴之費一日不知幾千萬也臨流諦視噲眩湍激之聲洋洋畎澮間冬不涸而夏不溢也形家又謂西北之水與東南諸峯坎離相交則鬱攸無災而清淑所鍾文明日盛其言雖渺要之儲蓄深則不虞有備血脉通則孕靈自廣理更有不爽者是役之功德彰彰若此洵與蘇白二公並垂千古矣從來興利與除弊難易交殊除弊者相其疾疢決去之而立效若大利所在其廢弛既久則其興復匪易往往逡巡瞻顧績用弗成故必至仁以宅衷大知以度務神勇以決幾始可奮發而奏功當役初興人或竊竊然相與難之乃不動聲色而數百年廢墜之業一旦修舉萬姓食其福百世蒙其利猗歟偉哉非大知大仁而濟以大勇者孰能與於此今梅公被 召掌邦政而金公膺 眷彌隆海隅日出之鄉歌頌四訖將以惠一方者惠天下澤洋恩溥胥視此湖矣余浙人也因述錢塘西湖以蘇白爲比二公之政績過於趙忠定而余之言遠不逮朱子姑爲記其

歲月俾後之職斯土者益加修治以上宣德意下福蒼生庶幾永永勿替云金公諱世榮三韓人梅公諱錡江南人

重修西湖記

鄭開極

閩會城之有西湖舊矣非獨以炎方火地藉金水以相制而邇爲城池金湯之固遠爲田畝灌溉之資形勝所關利賴攸寄良非淺鮮也我國家景命方隆河嶽懷柔咸歸流峙况閩爲海濱重地會城尤八郡屏藩之鎮而泱泱湖水六十年來湮塞不治或踞爲平田或割爲私浸而湖心一區竟爲一二宵人窟穴邱墓於其中風氣不宣蓄洩無備政之有關莫此爲甚中間非無當事之勤思開濬士大夫之陳請清復或未舉而格於物議或將興而敗於奸謀或諉於築舍之無成或灰於蜚言之數至信乎興大役捐殷費攬成算恢前規之未易得其人也今制府三韓金公向統禁旅鎮守閩邦慨然念之思爲清理適皇上倦思南土特授公以總督之任公蒞任未三月遂與撫軍梅公首議修城垣濬河道開西湖三事而西湖之役最鉅乃博徵諸乘廣詢輿論其湖之東岸自西城門以達北門沿城培基以丈計者五千八百有奇湖之西岸自迎仙橋折而北至荷亭將循象山貴安山而旋以復舊迹念已爲平田有待清復乃貫以長堤亘

西湖志

卷之四

藝文

七

以木植以丈計者縮東岸之半又鑿北堤以達北湖至龍腰山下跨新橋其上煥然頓還舊觀於是修湖心開化寺建法堂闢僧舍瓶左右鼓鐘樓爲祝聖之場殿閣崢嶸金碧輝映湖光蕩漾山容倩麗誠爲三山名勝一郡巨觀而萬堞增百雉之雄千頃慰三時之望尤爲國計民生之大其嘉惠吾閩世世賴之非公固莫能爲也然又有難者估費萬金勞役千指公率先捐俸躬親相度督以標弁課其勞動畫地分界畚鍤齊興無惰工無糜衆民間不聞鼙鼓之聲葺屋未損銖鎰之費成茲大役壯我邦基落成之日廣植佳蔭列成分防旣延高僧居之復畀以濱湖未復之田以爲經久之圖皆公計慮周詳吾民之幸也昔淳熙間趙公汝愚濬湖朱文公咏之有百年地闢有奇功創見猶驚鶴髮翁之句予自束髮釣遊便思此地急宜修濬登朝四十餘年屢以告之當事而皆未遑不意晚晚之年猶獲見公今日成茲盛舉也得不驚異而讚歎之乎但愧末學淺陋不能如文公之製爲歌詠以傳公之美政猶幸從父老後得泛畫舫於湖中載樽酒於隄上歌詠太平之樂載筆以紀公功烏容以不文辭也公元老壯猷如周方叔爲朝廷所倚畀政之澤閩者次第釐舉而予特詳其濬湖一事俾來者有考且永民思

出迎仙門三里直福州之西北隅有渠若鑑而橢泓然深綠以流者晉太康間郡守嚴高所鑿西湖也初高既拓新城於越王山之陽闕地爲二湖所以承傳城諸山之水吐吞海潮汐醞以溉田兼收魚蝦狸互之饒其利甚溥在東北者曰東湖在西北者曰西湖也唐貞觀十一年觀察使王翊復鑿南湖於郡之西南實引西湖水以達於東南蓋其時四郊之田無不被三湖之利者前人之功偉矣宋慶曆初奸民蠶食其中東湖湮而西湖亦微農以爲病於是吏始議濬復蓋一濬於嘉祐載濬於熙寧至淳熙中趙忠定公奏請大濬湖利稍復由宋歷元寢而不圖東南二湖俱廢而福人所恃以備旱澇者惟西湖矣明萬曆十六年知府江鐸重濬始穿北門右偏引湖水入城今北水門是也迨後提學僉事熊尙文按察使陳邦瞻相繼清理副使李思誠出私錢建牐今西北二鋪是也洎入 聖朝先後使於此而治之者康熙癸亥則姚公啟聖金公鏞癸未則金公世榮梅公錡也蓋百年以來湖旋治旋湮而自癸未迄今又四十有七歲矣高之初鑿其周二十餘里忠定濬時已隘十之七八萬曆重濬隘焉癸亥癸未之間兩濬猶隘也今則更加隘焉矣則以歷世久遠盜湖之奸不止而畚鍤之役匪易也乾隆戊辰

西湖志

卷之四

藝文

八

春余自皖移閩初至天久不雨西湖之淺可涉也夫泉流寢灌所以育嘉穀水利者農田之本福三面負山而前臨江其地勢西北高而東南下爲渠以承之則西北諸山之水索有鍾而溢有泄不徒利高仰之田也今東南二湖既塞難理而西湖又不亟爲濬復民何賴焉會督府喀公將有事於茲因與藩伯永君集議而命守王君董其役農隙水涸工遂以興始於十一月二十日逾十二月晦而竣糜白金二千二百有奇蓋新爲隄一千三百六十二丈五尺以步法計之湖之存僅七里餘矣其疏濬餘工則培城隍布牂杙樹楊榆修環隄之梁曰長河梅柳湖津後賢雄兵者五水所由注湖之道也完西北之牐北仍故而西之水則增焉所以節其下趨於江也葺湖心之開化寺及旁褒忠祠毋廢後觀也其用則取於贖鍰并入官之田直其力則鳩於傭作不以煩民其理侵佔私鬻之田儲穀爲歲繕費并廩寺僧凡此皆王君之勞而佐以成之速者則權通判徐君也夫是湖既字曰西又有長隄湖心寺之勝宋時若蔡君謨諸賢皆嘗觴詠於此蓋髣髴六橋孤山寺矣然杭之西湖白蘇二公後踵治者衆故鄴侯之美益彰是湖自忠定以來或忽而不治或治而不力迄今湖蝕且日甚矣非使於此者踵而治之再閱百年不幾與東南二湖胥爲陸乎此余之所深懼也則夫紹前人之功而惠此一方

之農俾嚴與鄴侯抗迹於無窮凡爲使者職也余何能無望於後乎喀公爾吉善永君寧俱滿洲人王君淳三韓人權通判徐君熊占余同郡人其在工之令丞牙校姓氏及理出占鬻之畝數租穀與夫材木之利別鑱於碑陰

唐福建觀察使檢校司徒陳公山亭碑記

陳治滋

古來賢哲挺生建大有爲之畧禦災捍患功德顯著禮宜百世祀者乃不能保一坏之土田夫牧子得以芟夷湮滅之此固仁人義士所爲憤惋而不平者若唐觀察司徒陳公巖是也當黃巢之亂也起山東轉掠江淮爲吳越錢鏐所逐遂從江右趨閩犯綏寧鎮陳公率鄉勇擊却之僖宗賜鼓角號九龍軍巢南下福州節度鄭鑑不能禦公助師一鼓平之鑑表公泉州刺史嗣又表公自代鎮閩九載大著威惠撫納王氏潮兄弟焉及巢陷京師僖宗奔蜀代州刺史李克用破滅之四年之間屠名城陷王都毒遍天下其能倡義興抗者惟克用鏐與公三人而已克用父國昌弟克讓葬代北明萬曆中盜發晉王墓有直指使者感夢發吏捕盜爲修墓而去宋熙甯間錢氏墓在錢塘臨安者蕪穢不治趙清獻公爲請修祠墳坡公表忠觀碑所爲作也獨陳公短世讓賢厝於閩會城北王氏國亂爲南唐所并公墓當以此時墮壞歷今幾九百年莫有過而問者康

西湖志

卷之四

藝文

九

熙四十三年甲申有村農持公銘石求售廣文林公侗兄弟讀其文知公墓所率諸生陳祈廣等以表章舊塚請於制府事格不行康熙六十年辛丑秋閩人士始克議捐修葺歸石於壙樹碑於阡冥器備具新塚巍然則李公範之力爲多又以祀典未備無以薦馨香崇德報也復於雍正三年冬請於署制府宜公檄有司歲撥候官田租八金以供祀事明著爲令而李公之志未已也捐士大夫而告之曰維司徒公倡義旅遏亂畧綏懷閩土復手握將印擇人而授之其豐功偉烈何遽不與吳越沙陀等今卽窳窳依然體魄無恙而一椽未建無以障風日肅觀瞻是委鉅典於草野也凡諸土木工役予其任之乃卽公墓右數武崇崗之麓背山面湖築丙舍一區堂廡閎敞垣墉堅厚凡餽食庖福之所悉具又築小屋三楹爲守塚之宅經始於雍正四年十二月以次年二月訖功升主之日陳牲薦醴合樂於堂數十年來閩人士咨嗟嘆恨以爲闕典者至是而崇報之事具舉焉夫事有不幸而出於久遠野無可尋之迹史無可徵之書古來之王侯將相豐碑巨闕荒涼漸滅者何限若陳公之官爵薨逝備書於綱目而黃璞所撰銘文所謂厝於敦業鄉太平里者又歷歷可考千百年後又有激昂慕古之士如林廣文兄弟者起而表章之且與陳祈廣諸人毅然力爭其事又得樂善好禮如李公範者慨

然任興復之責始終不倦以告厥成功是皆觀察公在天之靈默牖之也按淳熙三山志公兄礪初與公同廟祀於邑之蘆川繼遷飲井山西麓封仁濟侯賜額顯應公長子延晦當宋宣和時顯靈於海上建炎間著異於連羅兩邑勅封褒應昭利王子姓九人皆賜侯封初廟在連江東岱曰演宮再建越山麓曰東瀆九侯廟知宗正事濮王仲湜爲碑記今亦無存而演宮香火特盛是則觀察公之血食吾閩世世勿替尤非沙陀吳越之所可及也廣文林公侗爲吾閩文獻年八十有九弟佶壬辰進士官中書舍人李公範以子官封奉直大夫陳祈廣爲名諸生例皆得附書予既誌其顛末且歌以祀公九龍鼓角障南方撻彼巨憝靖陸梁豐功偉績書太常隴岡鬱鬱映湖光歷世九百久彌彰墓門無恙松檟長鬼風神雨何洋洋公兮鸞旌來帝旁九侯儻忽相攜將春秋不忒羞我觴蘭有秀兮菊有芳惠我民兮年穀穰自今千禩永無疆

水晶宮賦

陳祖虞

玄冥先生退處山谷漱氣癯外覃靜思慮怖地維之圯傾悸天柱之離析遽遽然不欲惆悵其神而無與遊也一日樂遊處士揖先生而進之曰青羲謝馭炎帝掌鳥自我西郊采采其蒲適有感乎紫微宮之迹而洞機子盛誇僕以水晶之麗也先生曰遇物能

西湖志

卷之四

藝文

十

感者俊睿恒心也極推美盛者揚挖古義也子請先述其所感而徐陳其所誇以俟餘論可乎樂遊處士曰嗚呼猗嗟傷哉崦兮嶸兮唯恍惚兮迤兮瀾兮尙霏微兮橫兮從兮殆莫識兮烟沉紫陌鐘動高峰木魅晨雨寒鷗夜風麒麟胷蝶雀舫述虹鎌斷斷於柏木罟彌天而粥鱗鞭沉牛以行地惱鵝鴨之盈庭嫣花墜影草色匝青狐悲隔院蕭蕭遠聽喜燕自差池初鶯怡復停盱衡蕪沒眇然失所無不攢心而屏形矧侈謝阿房之臺壯讓未央之門視仁壽則有缺規九成而非長野老不能悉載籍不能詳較皇家諸宮闕特其眇少者耳於邑盡傷可以已也卽景寄歎聊才情也是時洞機子矍然越席而起曰噫固哉子徒觀其終而不原其始攬其敗而不美其成必如所言是歧昌之靈臺猶夫銅雀烟波也子亦聞大閩王氏之飾宮而極古今巨麗乎若稽唐綱弛紐梁鹿解音徐溫雄視於江淮董昌錢鏐接踵於杭湖高季昌霸氣荆南我昭武王日戈橫海天旌彗雲迨我惠宗嗣藩服啟霸圖奄有全閩思欲攬羣雄一六合非居尊不足聽卑非處優不足奮衆乃建大號作六師咨經緯新法度廓規模康宗紹統疲精覈定君恃三世之威民忘一日之德無役使而不從無驅除而不赴提封之下鴻雁盡爲雞鳴雷霆皆爲膏雨乃方國之貢琛未至而水晶之殿衙創興度地營基依城臨湖前襟金

栗後枕芙蓉龍臺界南鱗溪迤東其山嶺巖嶮岫岬翠微漸漸巒岑并作礪礪大麓
連巷倒吸冶池其水周環四十浹滌鴻濛濛乎其清澈冽澗滃芋江沆漑海門細通右
攀翠鳳張翅翾翾左夾靈鼉喧空吼天上搖雪峰玉女花鈿下帶木蘭紫帽浮烟移樓
櫓平土垣畫墻垠促碩礪於是魯公執杼離朱按繩梅棠杉柷星磊拙枊枳振表中四
垂翼越棖木縷橫華柱雙清沿簷馬走億礎龜擎栱之以架罽覆之以鴛鴦布之以檻
闌鋪之以文磚乃命丹砂夾膠黑漆散泥量投頰壤殺堊以塗必欲玳瑁經日月璀璨
搖華星需昆吾之冶質浮水府之精英目瞽瞍而睽眈心悻恨而疎縱頤隨指而頓困
履踈蹻而縮蹤陰溝別館複道連宮遙穹窿之簪紫廣無止而袤無垠循廂榭之萬落
沒階街於何因紅荔丹柚蕉綠橄青榕髯似尺繫駮牽艇麋圈角解堤泛金鳧瑤壇仙
草千章榮敷西國葡萄戎王月支洛陽魏紫蜀府棠梨天水違植莫不時葩節郁以印
其靈禧於是天子布政閒暇四境狼銷師古豫遊素虬招搖撞萬石之鐘建罕雲之旗
鳴橫吹之鐃結出警之儀騎浮厲車軒麟禮寶皇離長春登紫府之秘殿挾春燕以宜
人席羅錯物耐注郵筒絲佩趣瑟巴渝舞空玳瑁釵亂貂蟬坐盈魚龍曼衍角戲鬚髻
極八方之殊體聊燕雀之怡情春容變隸以洽翫霞石當暑而館確蟾蜍映帶以秋爽

西湖志

卷之四

藝文

十一

江沙舍凍而夜明窮極奢肆晨夜無餘既亦停燕止玩適性觀魚舉垂天之罽繩樹百
尺之竿鈎縮掣鯨之絲縉駕舴舺之扁舟釋株椹籠羽衣出娉婷凭水坻鯁鯁雄蟹鼓
浪鮪鮪吹沫如星鮐鮓魚婢陽喬不鈎石首順時錦鯉孕琳文鱸宵飛每同躍而觸綸
亦共翼而斂鰓或隨义立或撥橫跳或從浪破或額點描攝巨口之細膾搥蔥薤以醒
消頽勞徹錦饌洗馬轉虹橋耕夫輟耰織婦鍵局閭閻奔命士庶絃聲此固天下之至
樂也使六藝君子談之于口布諸見聞足以表矣卽靡誦說猶在耳目於屬玉與礪氏
甯遂班哉且知者規事以和平麋鹿霜露聿悲宮衛其如淒楚何言未畢玄冥先生喟
然歎息曰二子之計興衰明辨哲矣雖然異吾所見也夫茅茨土階守貴也漢文露臺
昭儉也佚志迷樓築怨也雉兔葛藟同樂也古之人君動不爲身其宅民也以仁義爲
基以誠信爲柱以威靈爲垣以玉帛爲墜以俊雄爲工師以聽聞爲繩墨以除奸爲砌
以私見爲蔓以玄默淡泊爲深廣覆八區并書林開四門台階平使遊其宇者農飽三
時工不窳物婚姻以禮寢興以康敦子諒協性情淨嗜好休力役百年息寡弱扶文人
尙強力驅然後與之登三皇之堂窺五帝之庭隆大寶之位共北辰之垣業匪朽而可
慨乃經始之齊心致足尙也若徒盡欲恣淫瀦田禾之區汗川澤之原伐山林夸富庶

蚩蚩奉命將年離而月散當金碧之嶙峋卽塗膏而費血豈待禾黍與狐狸始驚心而動魄於是樂遊處士稽首再拜曰允矣先生談本六籍理揆聖神既高詞藻之衷亦非學者之見誠足以炙誕諧而窒怨思也下走謹奉命而昭矣

鎮海樓序

王穎如

有夏開宗無諸建國本牛女所分野驚旗鼓之插天勢拱神京咨岳侯而作鎮瀾澄棹海通夷譯以來庭千年之王氣雖湮億代之人文通振風成鄒魯比屋皆絃道接維伊立門有雪董夫子之巖瞻千仞執牛耳以司盟陳徵公之座擁百城當玳筵而授簡謝雄才於倚馬遵雅命以揮犀繡檻望虹橋恍躡九霄貝闕芳塔鄰鰲柱疑披萬里瑤圖於時宴值花朝遊當穀旦柳營奮武習長子以五戎藻沼觀文洩仲丁而萬舞美繁華之麗郡傳粉社之舊儀悵金粉於冷煙弔越陵於萎莽雕梁畫拱宿燕誰家竹嶼杏村聽鷓有客月窺螺渚光移合浦之珠霞起烏巒高奪赤城之幟虎嶺之陰風四嘯興彎李廣之弓馬江之險浪千層思發錢璆之弩何須排闥不假褰簾攬八極於掌中羅諸峰於足下千畦麥浪帶湖水以參差萬井鶯花敞樓臺而駘蕩榕橫幽壑幹竦鱗鱗苔蝕古碑字添蝌蚪南浦數聲聞折柳人上扁舟春城幾處見落梅客吹孤笛風光滿袖

西湖志

卷之四

藝文

十一

野况盈襟晴嵐將鴛瓦齊浮怪木與蓮峰競挺治池龍已徙劍浦耀芒僊觀鯉堪騎壺山煉翅榴花迷洞探奇豈特漁郎荔樹爲垣買笑曾憐妃子塵心到此皆滌樂事視昨猶濃複嶂嵌空雲霞萬色紅泉落磴金石千聲珠勒馬嘶草如飛錦繡圖中遊白哲玉盤龍羞花不起管絃墜襪醉香娥孤塚臥黃狐幾見鶴歸華表萬家藏綠樹翻疑犬吠雲端噓真氣而帝座通發浩歌而山靈震松陰籟起爽生巫峽雨千行花信風傳幻作瀟湘秋一片寄壯遊於武庫想清梵於華林海關天高玩鳶魚而有子今來古往對烏鬼以愁余穎如豹變需時所舞伊象雄飛有志爰守其雌稽古操觚豈以紛心溫飽學書習劍寧僅齋志功名因思通天地人之儒方會相期出處植君親師之節始堪繫籍聖賢是用心淑哲型業宗道要法參申菽水貴一日於三公志尹捐羹牆登九圍於二帝知窮通之有命集忠孝以爲裳馬骨堪售豈效楊朱雪涕龍門得託取同李白揚眉親霽月以澄懷詠高山而敬仰乘韶光之暇景縱大塊之奇觀嗟乎中原逐鹿幾何年漢殿已成禾黍恨此日釣龍餘往事越臺空見鷓鴣啼得句遜落霞敢曰江山有助啣杯延麗日何辭禽鳥相催謬效西子之顰聊紀東皇之勝大夫作賦浮白且就百篇小子學詩窺班兼成四韻

南極高樓聳大觀千秋雄控海天寬勢凌北嶺飛雕拱氣壓西湖涇畫欄昔日幸遊今
已矣祇餘猿叫空山裏浮雲閱盡世間情一嘯悲風天外起

西湖志

卷之四

藝文

十三